

accipi, ita ut ejus objectum adæquatum non sit solus sermo, verum etiam ea, quæ sermoni sunt cognata, ut quævis facta ita informanda, ut ab iis omnis fucus, simulatio, & dolus malus absint. Sic ergo Veracitas est tum in actionibus, ut illæ sint candidæ & sinceræ, tum in sermonibus, ut illi cum animi nostri sensis consentiant, ne scilicet aliud dicamus, aliud sentiamus, quod est hominis improbi. Sic Aristoteles *ὅτι δὲ τῶν ἀληθῶν ὄντων τε καὶ ψευδομένων εἰπωρῶν, ὁμοίως ἐν λόγοις καὶ πράξεσι, καὶ τῶν ὑποποιήματι*, id est, tam verbis, quàm actionibus & fictione. Sunt qui veracitatem & candorem faciunt species sinceritatis, & illam circa sermonem, hanc circa actionem versari disserunt, quæ sententia non est temere rejicienda. Qui insistant vestigiis Aristotelis, sub nomine ἀληθείας comprehendunt etiam εὐλικρίνειαν, i. e. sinceritatem sive integritatem, *aufrichtigkeit* & ἀνυποκρίσιαν, quam nos supra commune adjunctum omnium virtutum fecimus cap. 4. Huc pertinet quod veteres Græci dicere consueverunt in contractibus, *ἀνδρῶν δόλος καὶ ἀπάτης*, id est, sine dolo & fraude. Sic sumitur vox ἀληθείας apud Paulum ad Philipp. 1. v. 18. *εἴτε ὑποφάσει, εἴτε ἀληθεία*, id est, sive in speciem, sive sincerè; & 3. Johan. v. 3. Hujus etiam loci sunt, qui in dicendo & agendo tempestivè utuntur *παρρησία*, i. e. libertate seu licentiâ. Exemplum habemus in tribus viris sanctis, qui conjiciebantur in fornacem Babyloniam, Dan. 3. v. 16. 17. 18. in Mardocheo, Esther cap. 4. v. 13. & seqq. in Stephano, Act. 6. 7. in Paulo, Act. 22. & 23. in sanctis martyribus, qui *ἐν παρρησία* & constanter veritatem confessi sunt ad mortem usque. Solon Cræso Lydorum regi sincerè respondebat, se ante obitum non posse ipsum beatum prædicare, ex Herod. lib. 1. Hic quaeri potest, quum omnia debeant fieri sincerè, candidè & apertè, annon vir bonus interdum simulare & dissimulare possit? Resp. per distinctionem inter simulationem licitam & illicitam; illa est 1. quum non subest propositum injustè fallendi. 2. neq; consequendi majorem, quàm par est, honorem vel quæstum, 3. neq; detrectandi officia

Quæstio